



Կ. Ա. ՄԱԹԵՎՈՍՅԱՆ

ԻՇԽԱՆ ԳՐԻԳՈՐ ՄԱՄԻԿՈՆՅԱՆ—ՊԱՏՎԻՐԱՏՈՒ ԵՎ ՀՈՎԱՆԱՎՈՐ ԵԿԵՂԵՑԱԿԱՆ ԾԻՆԱՐԱՐՈՒԹՅԱՆ

Պատմահայր Մովսես Խորենացին իր «Հայոց պատմության» սկզբում գրում է մեր առաջին թագավորների և իշխանների անհմատասեր բարքերի մասին, կշտամբանքի խոսքեր ասելով նրանց «քանական հոգու անկատարության» վերաբերյալ. «...արդ՝ այն մարդկանց, որոնք չմտածեցին նույնիսկ իրենց բարիք անել և անուն ու հիշատակ թողնել աշխարհում, որքան կհարմարի մեր մեղադրանքը»¹: Սակայն Խորենացին, հանձին իր «պատմության» պատվիրատու Սահակ Բագրատունու, մեծարում է նրանց, ովքեր մտածում են նաև այլոց բարօրության մասին, լինում են գիտության և արվեստի հովանավոր, ովքեր կոչում քաջ են ու հայրենասեր:

Սերունդների օրինական պարտքն է հիշել մեր պատմության մեջ բարի անուն ու բարի հիշատակ թողած մարդկանց: Այդպիսիներից է Հայաստանի 661—685 թթ. կառավարիչ Գրիգոր Մամիկոնյանը: Պատմիչ Ղևոնդը այսպես է հիշում նրան. «Իսկ Գրիգոր իշխանն Հայոց յաւուրս իւրոյ իշխանութեանն խաղաղացոյց զաշխարհս Հայոց յամենայն հինից եւ յարձակմանց. զի էր այր երկիրոյն յԱստուածոյ, եղբայրասէր եւ օտարասէր եւ դարմանիչ աղքատաց, եւ կատարեալ ի հաւատս աստուածապաշտութեան: Եւ շինեաց նա տուն աղօթից ի գաւառն Արագածոյ ոտին ի յաւանն Արուն»²:

տաճար փառաց անուան Տեառն՝ գեղեցիկ վայելչութեամբ զարդարեալ ի յիշատակ անուան իւրոյ»³:

Գրիգոր Մամիկոնյանի անվան հետ են կապված Արունի փառահեղ Սուրբ Գրիգոր և Եղվարդի մոտ գտնվող Ջորավար տաճարների կառուցումը, որոնք որքան կատարյալ են ճարտարապետական և կառուցողական տեսակետից, նույնքան էլ արժեքավոր են իրենց որմնանկարներով, որոնք լինելով կառուցման ժամանակակից, արդյունք են պատվիրատու իշխանի ճաշակի և նախասիրության:

Տակավին երիտասարդ, Գրիգոր Մամիկոնյանը 654 թվականին Հաբիբ իբն Մասլամայի գլխավորությամբ Հայաստան ներխուժած արաբական քանակի կողմից գերվեց և երկրի անվանի մարդկանց որդիների, կանանց, երեխաների հետ (թվով 1775 հոգի) որպես պատանդ տարվեց Արաբիա: Չդիմանալով արաբական հորդանների բռնություններին ու կամայականություններին, Թեոդորոս Ռշտունուց հետո, Հայաստանի կառավարիչ դարձած Գրիգորի ավագ եղբայրը՝ Համագասպ Մամիկոնյանը, «որ էր այր ընթերցասէր և ուսումնասէր և վարժ ի բոլոր հրահանգս...»³ և հայոց Ներսես Գ Ծիանդ կաթողիկոսը դիմում են բյուզանդա-

² Ղևոնդ, Արշաւանք արաբաց ի Հայս, Փարիզ, 1857, էջ 84—85:

³ Հովհաննէս Դրասխանակերտցի, «Պատմութիւն հայոց», Թիֆլիս, 1912, էջ 88:

¹ Մովսես Խորենացի, Պատմութիւն Հայոց, Երևան, 1968, էջ 70:

կան Կոստանդ II կայսրին, առաջարկելով երկիրը վերցնել իր հովանավորության տակ: Խճճված լինելով ներքին զահակալական կոիվներում, արաբները չկարողացան խոչընդոտել հայ-բյուզանդական մերձեցմանը և բավարարվեցին իրենց մոտ գտնվող հայ պատանդների դաժան սպանողով, որից միայն 22 մարդ փրկվեց, ուրիշ տեղ գտնվելու պատճառով: Դրանց մեջ էր նաև Գրիգոր Մամիկոնյանը: Արաբական խալիֆայության ներսում զահակալական կոիվները վերջացան Մուավիայի հաղթանակով, որը հռչակվեց խալիֆ (661—680), դառնալով Օմայան հարստության հիմնադիրը և մայրաքաղաք հռչակելով Դամասկոսը:

Հայաստանի կառավարիչ իշխան Համազասպ Մամիկոնյանը մահացավ 661 թվականին: Հայոց նախարարական ժողովը քաղաքականապես վերակոդմնորոշվելով դեպի հզորացած խալիֆայություն, հատուկ դիմումով խնդրեց Մուավիային Հայաստանի կառավարիչ ուղարկել մահացած իշխանի կրտսեր եղբորը, պատանդության մեջ գրությունով Գրիգորին: «Մուավիա կոչ է գրիգոր և գժմբատ, որ էին պատանդք ի դրանն արքունի, եւ տայր Գրիգորի գլխաւ իշխանութեանս Հայոց. եւ առաքէ զնոսա բազում մեծարանօք յաշխարհս Հայոց»⁴: Սկսվում է Գրիգոր Մամիկոնյանի քառհիսնամյա (661—685) իշխանության շրջանը, երբ նա. «մի կորովով, որ իր տոհմին էր հատուկ, կառավարում էր երկիրը», գրում է Լեոն⁵: Արամ Տեր-Ղևոնդյանը Գրիգոր Մամիկոնյանին համարում է յոթերորդ դարի Հայոց տիրակալների մեջ ամենանշանավորը⁶: Հավանաբար իր իշխանության առաջին տարում, իշխանը ամուսնանում է Հեղինեի հետ, որը Աղվանից աշխարհից էր⁷: Արունի տաճարի արևելյան պատին, եկեղեցու հիմնադրման մասին վկայող արձանագրությունում կարդում ենք. «...հիմնարկեցաւ ասորք կաթողիկէս ի ձեռն Գրիգորի Մամիկոնեանի Հայոց իշխանի եւ Հեղինեի մորին գուգակըցի ի քարեխաւսութիւն շինաղաց զսա»⁸:

Գրիգոր Մամիկոնյանը խաղաղության և անդորրության մեջ է պահում երկիրը, անգամ կատարում է որոշ քարեփոխություններ,

որոնց մասին խոսում է Հովհաննես Դրասխանակերտցին. «...ստաջնորդ գտեալ յոգնապատիկ կարգաց և ուղղութեանց, շինութեան և խաղաղութեան, ապահովութեան և քարեմասն լրութեան. որ գրեթէ յաշխարհի իբր յանապատի գալով՝ հետևեր զկնի ամենայն արդար վաստակոց»⁹:

Գրիգորը հմուտ քաղաքագետ էր: Նրա օրով Հայաստանը կարողացավ խուսանալ արաբա-բյուզանդական ավերիչ պատերազմներից մասնակցելուց, որ նրա օրոք և հայ նախարարական տների միջև չեն եղել կոիվներ ու երկպառակություններ: Սակայն Հայոց իշխանն ավելի հեռատես էր: Նա կարճ ժամանակամիջոցում շենացնում է իր նստավայր Արունը, շինարարական խոշոր աշխատանքներ տանելով, ըստ երկվության, երկրի կենտրոնը և կաթողիկոսանքը Դվինից Արուն տեղափոխելու նպատակով: «Պաշտոնական մայրաքաղաքը Դվին քաղաքն էր, քայց փաստորեն Հայաստանի ամեն իշխանն նստում էր իր արքունիքում—Թեոդորոս Ռշտունցին՝ Աղթամարում, Համազասպ և Գրիգոր Մամիկոնյանները՝ Արունում...»¹⁰:

Արունը Հայաստանի հնագույն բնակավայրերից է: Այնտեղ և նրա մերձակայքում հայտնաբերվել են նախնադարյան, ինչպես նաև ուրարտական շրջանի բազմաթիվ հուշարձաններ: IV—V դարերում Արունը հիշատակվում է որպես արքունի գործերի ձմեռային կայան: Գրիգոր Մամիկոնյանի ժամանակ այն դարձավ քաղաքական ավան, որ իշխանը կառուցեց Ար. Գրիգոր հսկա շածավալ տաճարը, նրա հարավային կողմում իր ջբեղ պալատը և պարսպապատեց երկու ձորերի հովանոսանում գտնվող ողջ ավանը: Այս շինարարական գործերի հակիրճ նկարագրությունը արել է Հովհաննես Դրասխանակերտցին: «Ջալսու ժամանակա քարեպաշտ իշխանն Գրիգոր Մամիկոնեան աստուածային այցելութեամբ հիմնադրեալ զչքնաղագեղ եկեղեցին, որ ի դաստակերտին Արուն՝ շինէ զնա ստիպով, երկնային իմն ճեմարան յարդարեալ ի վերայ երկրի: Եւ ի հարաւոյ կողմանէ դնէ զարքունիս իւր յեզր քարածայռ ձորակին, յորում բոխէ ականակիտ աղբիւր պղպշակեալ բնո քարածերպս փմարդ քարանցն, որ զեզերս ունի իբրև զպսակ պատուարի: Եւ ապա հաստահեղոյս քարամբք և կրով պարսպեալ՝ կարգէ տուն բնակութեան իւ-

⁴ Ղևոնդ, նշված աշխ., էջ 34:

⁵ Լեո, Երկերի ժողովածու, հ. Բ, Երևան, 1967, էջ 319:

⁶ Անդ, ծանոթագրություն, էջ 736:

⁷ Մովսես Կաղանկատվացի, Պատմություն աղվանից աշխարհի, Երևան, 1969, էջ 184:

⁸ Անդ:

⁹ Հովհաննես Դրասխանակերտցի, նշված աշխ., էջ 90 (ընդգծումը մերն է—Ա. Մ.):

¹⁰ А. Н. Тер-Гевондян, Армения и арабский халифат, Ереван, 1977, стр. 55.

րոյ: Ծիւնէ անս անորանց ուխտի կրօնաւորական դասուց, յորում և եկեղեցի պայծառապաճոյն ի մնա յարդարեալ ըստ յարեւելից կուսէ դաստակերտին մեծի Եղիշարդայ...»¹¹:

Գրիգոր Մամիկոնյանի կենսագրական մի հետաքրքրական դրվագ է հիշվում վարքաբանության մեջ, կապված Դավիթ Իվինեցու հետ: Սուրհան անունով պարսիկ զորականը, որը ազնվականական ծագում ուներ, բայց ծառայում էր արաբական բանակում, դիմում է Հայոց իշխանին քրիստոնեություն ընդունելու խնդրանքով: Բարեպաշտ Գրիգոր Մամիկոնյանը մեծահոգաբար անձամբ դառնում է Սուրհանի կրնքահայրը, նրա վրա դնելով իր հոր անունը՝ Դավիթ, և ընծայելով Կոտայք գավառի Զագ գյուղը: Մկրտությունը կատարվում է հայոց Անաստաս կաթողիկոսի ձեռքով, Արուճի տաճարի օծման օրը¹²: Մահմեդական Սուրհանի կամովին կրոնափոխ լինելն ինքնին հետաքրքիր լինելուց բացի, վկայում է նաև այն մասին, որ այդ շրջանում Հայաստանը թե՛ տնտեսապես և թե՛ մշակութային շատ բարձր լինելով մվաճող արաբներից, ուներ և որոշակի քաղաքական ինքնություն, այլապես մահմեդականները չէին հանդուրժի իրենց հավատակցի կրոնափոխությունը¹³: Այդ ժամանակ Հայաստանում չկային ո՛չ բյուզանդական և ո՛չ էլ արաբական գորքեր: Երկիրը միայն ձևականորեն էր կախման մեջ խալիֆայից, որի գորքերը միայն Չորրորդ Հայքում էին մնացել¹⁴: Պատմաբան Լեոն գրում է. «...խաղաղ ու շինարար ժամանակն ամենից առաջ հեղհեղ իրեն, Գրիգոր իշխանին էր անհրաժեշտ, նրա մեջ նստած խոշոր կուլտուրական հակումներին բավարարություն տալու համար»¹⁵: Իսկապես, հեղինակավոր իշխանը չվատնեց ժամանակը աննպատակ, այլ իր ողջ ուժն ու եռանդը ներդրեց երկրում խաղաղության ու անդորրության պահպանման

նր, նպաստեց երկրի տնտեսական վերելքին, շինարարության ծավալմանը: Նրա իշխանության առաջին տարիներին կաթողիկոսական գահի վրա էր նույնպիսի հակումների տեղ կաթողիկոս Անաստաս Ակոնեցին (661—667): Մինչ այդ նա, Ներսես Գ կաթողիկոսի բացակայության ժամանակ, ղեկավարել էր Զվարթնոցի տաճարի շինարարությունը, իսկ կաթողիկոսության տարիներին իր հայրենի Ակոտի գյուղում կառուցում է Սբ. Հակոբ եկեղեցին: Անաստաս կաթողիկոսը զբաղվել է հայոց անջարժ տոմարի հարցերով և Անանիա Օհրակացուն հանձնարարել գրելու «Քննիկոն» դասագիրքը՝ բարձր տիպի դպրոցների համար, որի մեջ քառյակ գիտություններից բացի զետեղված էր նաև հայոց անջարժ տոմարը¹⁶: Պատմիչների մոտ Անաստաս կաթողիկոսը հաճախ է հիշվում Գրիգոր իշխանի հետ՝ Արուճում, տաճարը օծելիս, Աղվանից իշխան Զվանջիին դիմավորելիս և այլն:

Որ Գրիգոր Մամիկոնյանը իրոք ուներ մշակութային հակումներ և բարձր ճաշակ, պարզ է դառնում նրա կառուցած եկեղեցիների և պալատի ուսումնասիրությունից: Արուճի տաճարը VII դարի հայկական ճարտարապետության ամենանշանավոր հուշարձաններից է: «Այն մի գոհար է VII դարու մեջ», գրում է Թ. Թորամանյանը¹⁷: Կառուցվել է 661/662—666 թվականներին¹⁸: Այսօր գմբեթի բացակայությունը (որը ամբողջությամբ փլվել է) բոլորովին չի խանգարում ըստ արժանվույն գնահատել տաճարի փառահեղ հորինվածքը և նրա մեծածավալ դահլիճի շինարարական կատարելությունը, որը ունենալով իր նախատիպը՝ հանձին Պողոսի տաճարի, նույնական կրկնություն չէ բնավ: Ինչպես նկատում է Ն. Տոկարսկին, Արուճի ճարտարապետը քաջատեղյակ էր հայկական ճարտարապետական արվեստում տեղի ունեցող առաջընթացին, իսկ այդ ժամանակ նոր էր ավարտվել Զվարթնոցի շինարարությունը և «...անկասկած Ներսես Ծիճողի կառույցի ազդեցության տակ էր և Արուճի ճարտարապետը»¹⁹: Այդ ազդեցությունը, ըստ նրա, արտահայտվում է գմբեթի թմբուկի յուրա-

¹¹ Հովհաննես Դրասխանակերտցի, նշված աշխ., էջ 90—91:

¹² «Լիակատար վարք և վկայաբանությունն արքոց», վեներտիկ, 1810, էջ 561:

¹³ Հետագայում, Գր. Մամիկոնյանի մահից հետո, Հայաստանի արաբ ոստիկաններից մեկը պահանջում է Դավթից, որ նա ուրանա քրիստոնեությունը և նորից ընդունի մահմեդականությունը: Սակայն անգամ դաժան տանջանքներից հետո Դավթը հրաժարվում է այդ անել, որի համար նրան Դվիմում խաչում են: —Մ. Օրմանյան, Ազգապատում, Կ. Պոլիս, 1912, էջ 776—777:

¹⁴ А. Н. Тер-Гевондян, նշված աշխ., էջ 49:

¹⁵ Լեո, նշված աշխ., էջ 319:

¹⁶ Ա. Մաթևոսյան, Անանիա Օհրակացու «Քննիկոն», «ՀՍՍՀ ԳԱ Լրաբեր», 1974, № 7, 8:

¹⁷ Թ. Թորամանյան, Նյութեր հայկական ճարտարապետության պատմության, Երևան, 1948, էջ 121:

¹⁸ Կ. Մաթևոսյան, Արուճի տաճարի 666 թ. որմնակարը, «ՀՍՍՀ ԳԱ Լրաբեր», 1981, № 3, էջ 85—92:

¹⁹ Н. М. Токарский, Архитектура Армении IV—XIV вв., Ереван, 1961, стр. 109.

տիպ տեղադրվածության մեջ և լուսամուտների քիվերի զարդաքանդակներում, որոնք հյուսածո են, ինչպես Զվարթնոցում: Արուճի տաճարն ունի ներքին տարածության ծավալային ազդու և ամբողջական լուծում: Մեծածավալ տաճարի (16,95×34,6 մ.) բոլոր պատերը ներսից ծեփված են եղել, հավանաբար ունեցել են որմնանկարներ²⁰, իսկ ավագ խորանի գմբեթարդում մինչև այժմ պահպանվել է 666 թվականին նկարված որմնանկարի մի մասը: «Առանց չափազանցության կարելի է ասել,—գրում է Գ. Փոցկուն,—որ Արուճի որմնանկարը այսօր մնում է որպես ամենահիմնավոր կերպով ուսումնասիրված հայկական որմնանկարը VII դարից²¹: Իրոք, Արուճի տաճարն ու նրանում գտնվող որմնանկարը իրենց վրա են հրավիրել շատ ուսումնասիրողների ուշադրությունը, սակայն այդ գործում հիմնական ավանդը պատկանում է Լ. Ա. Դուրնովին, որը խորագրին ուսումնասիրության ենթարկելով որմնանկարը, 1952 թվականին դրա վերաբերյալ տպագրել է ոչ մեծ, բայց մեծարժեք մի հոդված «Стенная живопись в Аруче» վերնագրով²²: Նրա կարծիքով Արուճի որմնանկարում տակավին զգացվում է հայկական հելլենիստական արվեստի ազդեցությունը, որը երևում է ինչպես որմնանկարի լավ պահպանված զարդագույն և Գառնիի հեթանոսական տաճարի քանդակազարդ քիվերի նմանությունից, այնպես էլ կատարման թեթև և ազատ ոճից²³:

Ամբողջ որմնանկարը հետևյալ կառուցվածքն ունի: Ավագ խորանի գմբեթարդում պատվանդանի վրա կանգնած Քրիստոսի պատկերն է (մոտ 7 մետր բարձրություն է ունեցել, այժմ մի մասն է պահպանված, ծնկներից մի փոքր վերև): Պատվանդանի մոտից անցնում է ամբողջ խորանը երիզող բարձրարվեստ զարդագույնի, որն ամենից լավ է պահպանված: Ներքևում, Ավագ խորանի երկու կողմի պատերին, պատկերված են եղել վեցական առաքյալներ (այժմ հյուսիսային կողմի պատին նրանցից վեցի պատկերներն են միայն պահպանվել): Քրիստոսի ձախ ձեռքին կա ոլորաններով

ցած իջնող մագաղաթազարդ, Հովհաննու Ավետարանից վերցված քաղվածքով («որ ունի զպատ[ու]իր[անս իմ] եւ [պահէ] զճ[ուսս] մա [է.] որ սիրեն [զիս եւ ոյր] սիրեն զ[իս, ս]իրեսց[ի ի հարե իմե], եւ [սիրեսցից զմա] եւ երեսցուցից մմա զիս...», զլուխ XIV, տուն 21), որի միայն մի մասն է ընթերցելի:

Որմնանկարի վերին մասի մոտավոր վերականգնության փորձ է արել Ն. Քոթանջյանը²⁴: Արուճի որմնանկարը ունի պատմա-մշակութային խոշոր արժեք, այն մեզ հասած հայկական առաջին գեղարվեստական նկարն է, որը պահպանվել է նկարիչ արվեստագետի անունը: Քրիստոսի ոտքերի տակ գտնվող պատվանդանի փոքրիկ ոտքերի արանքում, նկարում օգտագործված կանաչ ներկով գրված է «Ստեփանոս»: Սակայն մակագրությունը դրանով չի ավարտվում: Ահա նրա ընթերցելի տառերը՝ «ՍՏԵՓԱՆՈՍ Ն-Ա-ԵԱՑ»: Մեր կարծիքով ոչնչացած մասը պետք է վերականգնել այսպես. ՍՏԵՓԱՆՈՍ Ն[Կ]Ա[Ր]ԵԱՑ:

Արուճի որմնանկարը հասուն վարպետության հասած նկարչի ստեղծագործություն է: Այն նոր և կարևոր էջ է գրում հայկական գեղարվեստական մշակույթի զարգացման պատմության մեջ՝ իրավամբ դասվելով միջնադարյան հայ արվեստի ամենաարժեքավոր հուշարձանների շարքը: Ինչ խոսք, Արուճի տաճարի պատվիրատու և հովանավոր Գրիգոր Մամիկոնյանը հավանություն է տվել որմնանկարին, գուցե և պատկերված է եղել այնտեղ: Այս ենթադրությունը արվեստաբան Լ. Դուրնովին արել է ելնելով նրանից, որ ա) Քրիստոսի պատկերի աջ և ձախ կողմերում քաղվական մեծ տարածություն կա (այժմ ծեփագործի), որ պետք է պատկերներ եղած լինեին, բ) Քրիստոսի պատկերից դեպի աջ երևում է կառույց գույնի թանկագին քարի նկար, որը ըստ երևույթին հագուստի մաս է զարդարել, հավանաբար ոտնամանի, գ) Եթե կենտրոնական պատկերի երկու կողմում նկարված են եղել հրեշտակներ, ապա բաց է մնում թանկարժեք քարի պատկերի հարցը, որովհետև հրեշտակների ոտքերին

²⁰ Л. Дурново, Стенная живопись в Аруче «Տեղեկագիր ՀՍՍՀ ԳԱ», 1952, № 1, էջ 55:

²¹ Г. Пунко, Иконографические схемы армянских алтарей: росписей VII века, «Историко-художественные исследования», 1980, № 3, էջ 153:

²² Л. А. Дурново, *և.վ.վ. աշխ.*

²³ Л. А. Дурново, Краткая история древнеармянской живописи, Ереван, 1957, стр. 12. Л. А. Дурново, Стенная..., стр. 49.

²⁴ Н. Котанджян, Цвет в раннесредневековой живописи Арменин, Ереван, 1978, стр. 42—45, иллюстрация № 54.

²⁵ Լ. Ա. Դուրնովին մակագրության վերջին տառերը կարդացել է ԵԱՑ (Стенная живопись в Аруче, էջ 65), սակայն որմնանկարի երկրորդ ընթերցման ժամանակ ընթերցելիս հնագրագետները հաստատելին, որ վերջին տառը «Յ» է, այսինքն ԵԱՅ:

մաման զարդ չէր կարող լինել, դ) Ծքեղ ունաման կարող էր կրել իշխանը, և չի բացառվում, որ Քրիստոսի երկու կողմում պատկերված են եղել Գրիգոր իշխանը և իր կին Հեղինեն²⁶:

Գրիգոր Մամիկոնյանի կառուցած և՛ Արուճի, և՛ Եղվարդի եկեղեցիները ունեցել են որմնամակարներ, դժբախտաբար իշխանի պալատը (ինչպես և Հայաստանի շատ պալատներ) այնպես է ավերված, որ հնարավոր չէ այնտեղ գտնել մեկ ամբողջական պատ գտնել: 914 թվականին Գագիկ Արծրունին Աղթամարում կառուցում է իր բարձրաքանդակներով և որմնամակարներով հրուշակված, Ս. Խաչ եկեղեցին, իսկ նրանից քիչ հեռու՝ իր պալատը, որը, ըստ պատմիչ Թովմա Արծրունու, զարդարված էր թագավորի առօրյա կյանքի (որսի, խնջույքի) կենցաղային պատկերներով²⁷: Գագիկի պալատից ոչինչ չի մնացել, շատ քիչ բան է մնացել նաև Գրիգոր Մամիկոնյանի պալատից, «սակայն պետք է ենթադրել, որ մեծաօրինակ (Գագիկ Արծրունու պալատ—Վ. Մ.) պալատական որմնամակարչությունը Հայաստանում միակը չի եղել»²⁸: Հնարավոր է, որ այդպիսիք եղած լինեն նաև Արուճում:

Պալատի տեղում 1947—1948 թթ. պեղումներ են կատարվել Օ. Ս. Եղիազարյանի ղեկավարությամբ: Այս շինության կառուցվածքի և շինարարական նրբությունների ուսումնասիրությամբ զբաղվել է ճարտարապետության դոկտոր Վ. Հարությունյանը²⁹: Գրիգոր Մամիկոնյանի պալատը և՛ իր չափերով, և՛ կառուցվածքով հիշեցնում է Դվինի կաթողիկոսական պալատը, միայն կենտրոնական սյունազարդ դահլիճում Դվինի նշված պալատի ներքին չորս զույգ սյուների փոխարեն Արուճում երեք զույգ սյուներ են եղել: Պալատի հյուսիսային տաճարին նայող կողմում բացօթյա սյունազարդ ճեմարան է եղել: «Առանձնակի հետաքրքրություն են ներկայացնում սյուների խոյակները,—գրում է Օ. Խաչիսյանը,—նրանք միանման են դվինյան խոյակների հետ, ոչ միայն հորինվածքով, այլ գրեթե նաև չափերով: Սակայն դա ընդօրինակություն չէ, այլ հին ձևերի վերամշակումը համապատասխանեցված կատարման ժամանակաշրջանին, որը արտահայտվում

է զարդաքանդակների ձևավորման մեջ»³⁰: Դվինի կաթողիկոսական պալատի և Արուճում կառուցված պալատի այս մեծությունը, որը երևում է նաև հատակագծերի համեմատությունից³¹, անուղղակիորեն վկայում է այն մասին, որ Գրիգոր Մամիկոնյանը, մայրաքաղաքին վայել շինություններ կառուցելով, նպատակադրվել էր նաև երկրի կրոնական կենտրոնը Դվինից Արուճ տեղափոխել: Դրա պատճառը արաբ պաշտոնյաների ներկայությունն էր Դվինում:

Իշխանական պալատը Արուճում VII դարի աշխարհիկ ճարտարապետության եզակի հուշարձաններից է: Այս կառուցումներից բացի Գրիգոր իշխանը իր աթոռանիստ ավանը շրջապատում է ամուր պարիսպներով և վերաշինում արշակունյաց ժամանակներից մնացած բերդը:

Գրիգոր Մամիկոնյանի շինարարական բեղմնավոր գործունեության արգասիքն է նաև Եղվարդից երեք կմ. հյուսիս արևելք ընկած Զորավար եկեղեցին, կառուցված VII դարի 70-ական թվականներին: Եկեղեցու հարավային մասն ու գմբեթը չեն պահպանվել, փլված մասի հետ հավանաբար կորել է նաև շինարարական արձանագրությունը: Զորավար եկեղեցին ունի ութաքսիդ հորինվածք, կառուցված է դարչնագույն տուֆով: «Այս կառուցվածքը աչքի է ընկնում կոնստրուկտիվ հարցերի մշակման մեծ հմտությամբ,—գրում է Ս. Մնացականյանը,—ուրեք կամարները (որոնց հորիզոնական համադրումները չեզոքացնում են յուրաքանչյուրին հպված հետնախորշերով) ստեղծում են հենց այն հուսալի հիմքը, որի վրա դրվում է գմբեթը, իր ներսից շրջագծային, իսկ դրսից 12 միստեր ունեցող թմբուկով»³²: Հուշարձանի հարդարանքը կրում է Զվարթնոցի ազդեցությունը—նկատում է Մ. Հասարթյանը³³: Եվ դա ոչ միայն պատահական չէ, այլև օրինաչափ, քանի որ եթե Գրիգոր Մամիկոնյանն էր տաճարի պատվիրատուն, ապա շինության կառուցողը իշխանի ճարտարապետն էր, այն երախտավորը, որը նախագծել և կառուցել է նաև Արուճի հույակերտ տաճարն ու պալատը և որի անունը ցավոք չի հասել մեզ: Զորավար եկեղեցին արտաքին ճակատներում ունի ութ լայն եռանկյունաձև խորշեր, որոնք

²⁶ Л. А. Дурново, Стенная..., стр. 64.

²⁷ Թովմա Արծրունի, Պատմություն Արծրունյաց տան, Երևան 1978, էջ 298:

²⁸ Л. А. Дурново, Краткая история ..., стр. 16.

²⁹ Վ. Հարությունյան, VII դարի աշխարհիկ ճարտարապետության մի նոր հուշարձան, «Տեղեկագիր ՀՍՍՀ ԳԱ», 1958, № 8:

³⁰ О. Халпахчьян, Гражданское зодчество Армении, Москва, 1971, стр. 94—95.

³¹ Անդ, էջ 92, 95:

³² «Այնքանի հալ ճարտարապետության պատմության», Երևան, 1984, էջ 165—167:

³³ Մ. Հասարթյան, Զորավար, ՀՍՀ, հատոր 3-րդ, 1977, էջ 705:

արտաքին ձևավորման արտահայտիչ գործոններ են: VII դարի հայկական օարտարապետության առավել նշանակալից հուշարձանների թվին է պատկանում Հորավար եկեղեցին:

Ինչպես ցույց է տալիս յոթերորդարյան հայկական եկեղեցական կառույցների քնննությունը, նրանց զգալի մասը ունեցել են որմնակարներ: Զորավարի պատվիրատու և հովանավոր Գրիգոր իշխանը կառուցելով տաճարը, այն զարդարել է նաև որմնակարներով, որոնցից այսօր շատ փոքր հատվածներ են պահպանվել: Արուճի տաճարի մասին խոսելիս նշեցինք, որ այնտեղ որմնակարում պահպանվել է Ստեփանոս կարչի անունը: Չի բացառվում, որ Զորավարում նույնպես աշխատել է Ստեփանոսը: «Գույնը Հայաստանի վաղ միջնադարյան գեղանկարչությունում» աշխատության մեջ Ն. Քոթանջյանը գրում է. «Եղվարդյան որմնակարի (Զորավարի—Վ. Մ.) գունային տոնայնությունը վկայում է Արուճի որմնակարի ներկայականի հետ նրա ունեցած մոտիկության մասին...»³⁴: Զորավարի կանգուն մնացած չորս խորաններից երեքում երևում են որմնակարի հատվածներ, որոնք ներկայացրել են հսկայական գեղազարդեր: Ահա թե այդ մասին ինչ է գրում Լ. Դուրնովն. «Գրիգոր Մամիկոնյանի կառուցած Զորավարի որմնակարը առանձնանում է բոլոր նախորդներից: ...Հնարավոր է, որ գմբեթադրոմ, խորանների արանքում գրտնրվող սյուների վրա և գմբեթում տեղադրված են եղել ուրիշ բնույթի ինչ-որ պատկերներ, բայց այն հանգամանքը, որ ավելի հարմար և երևացող տեղերը զբաղված են եղել գեղազարդերով, առաջացնում է հիմնավոր ենթադրություն, որ մնացած մասերը նույնպես պատված են եղել գեղազարդերով»³⁵: Զորավարի որմնակարի գունային կառուցվածքը քննելով Ն. Քոթանջյանը գտնում է, որ այն ունի երկակի բնույթ: Որմնակարի հատվածներից մեկում պահպանված հագուստի պատկերի մասին նշելով, որ այն ի հակադրություն գեղազարդային մոտիվների զծալին գրաֆիկական լուծման, ունի ազատ գեղանկարչական հնարքներ, ավելացնում է. «Այդ լուծումը հիշեցնում է Արուճի որմնակարի գունային կառուցվածքի սկզբունքները»³⁶:

680 թվականին խալիֆ Մուավիայի մահից

հետո Հայաստանը դադարեց արաբներին հարկ վճարել: Խալիֆայության ներսում մղվում էին զահակալական արյունահեղ պատերազմներ, և Գրիգոր իշխանը իր կառավարման վերջին շրջանում 683 թվականից դարձավ երկրի լիիրավ և միակ տերը: Հայաստանը մինչև 689 թվականը ձեռք բերեց կառարյալ անկախություն³⁷: Սակայն հայերին փնտրված չէր երկար վայելել խաղաղություն և հանգիստ: Դեռևս 80-ական թվականներին հյուսիսից հունական և խազարական քաղաքապետական ցեղերը սկսեցին իրենց ավերիչ ներխուժումները Անդրկովկաս: Հայոց իշխան Գրիգորի և Աղվանքի իշխան Ջվանշիրի փորձերը հուններին քրիստոնյա դարձնել, ինչպես երևում է, չսովեցին սպառված արդյունքը: Տարեցտարի սպառնալիքների ջոկատները ավելի էին առաջ շարժվում: Խազարական ցեղերի մի խոշոր ներխուժում տեղի ունեցավ 684—685 թվականներին³⁸: Հայրենասեր Գրիգոր իշխանը հապճեպորեն հավաքած հայկական, աղվանական և վրացական զորքերին տարավ քաղաքապետական քաղաքների դեմ, կրոնից ինչպես ապրում և նահատակվեց այդ լուրում հանուն հայրենիքի: «Հիսուսային ազգն որ ասին խազիրը... սպանին ի պատերազմին զիշխանն Գրիգոր եւ զբազումս ի նախարարացն եւ զիշխանն Վրաց եւ Աղուանից»³⁹:

Ժնարար և խաղաղասեր հայոց իշխան Գրիգոր Մամիկոնյանը իր մեծահամբավ տոհմի քաջամարտիկ նախնիներից շատերի պես պատերազմում փառքով պսակեց իր անունը: Հայոց փորձություններով ի պատմությունը ավելի քան հարուստ է պատերազմների ու ավերմունքների, կոտորածների ու կոլոպուտների դրվագներով և հիբրավի, այդ պատմության մեջ հաղթանակներ են նաև խաղաղության այն ժամանակահատվածները, որոնք ձեռք են բերվել մեծազան եռանդով ու արշավ: Զոր չէ պատմիչ Դևոնդր Գրիգոր իշխանի կառավարած Հայաստանի մասին գրում «Եւ եղև քաղում խաղաղութիւն շատրս նորս իշխանութեանն»⁴⁰: 25-ամյա խաղաղություն, որը մեծապես նպաստեց երկրի քաղաքական հզորացմանը, տնտեսական բարգավաճմանը, գիտության ու արվեստի զարգացմանը:

³⁷ «Հայ ժողովրդի պատմություն», Երևան, 1975, էջ 355:

³⁸ Ա. Ն. Թեր-Գեւոնդյան, նշված աշխ., էջ 51:

³⁹ Դևոնդր, նշված աշխ., էջ 35:

⁴⁰ Դևոնդր, նշված աշխ., էջ 34:

³⁴ Н. Котанджян, *նշված աշխ.*, էջ 51:

³⁵ Л. А. Дурново, *Краткая история*, էջ 12:

³⁶ Н. Котанджян, *նշված աշխ.*, էջ 52: